

四庫全書

子部

欽定四庫全書

子部
類說卷八

詳校官中書臣張姚成

員外郎臣牛稔文覆勘

總校官檢討臣何思鈞

校對官典簿臣劉景岳

謄錄監生臣鄧捷成

欽定四庫全書

類說目錄

卷八

述異記

盤古氏

龜曆

堯時十瑞

斑竹

鬼母

走山泣石

堯碑禹碣

相思木

懶婦魚

龍綃宮

女珊瑚

應龍

玄鹿

靈龜

附錄
虎

封邵化虎

梟獍

金鷄玉犬

金蠶玉燕

吳王春霄宮

射堂

孝竹頌

橘籍

白蓮斑竹

脂粉塘

磨鏡石

却塵犀

玄鶴中箭

玉女擣練砧

神人驅石

五色蛾

妬女泉

爛柯

螺亭

七尺棗三尺梨

黃鶴樓

白衣素女

秦獄地

活人草

龍肝爪

慈竹

獬豸

猿獾

龜生毛

天雨金等物

夢化飛蛾

水木之精

離合風

蜃如猪羊

三十六洞天

鮫室

神鉦

天雞

香尉

水精宮

金李

辟寒香

績水

迷穀

懶婦草

驚精香

紫萱

仙人杏

靈楓

驚歌鳳舞

蛟妾

廣異記

掘太歲地

囚父報德

猿狗為怪

富貴正由蒼蒼

銀坑龜

芝圃

仙洞樗蒲

金羊玉馬

王弼守門

摩頂松

許旌陽斬蛟劍

玉英粉

闕

蟹螯

闕

老人吹笛

闕

神降詩

闕

道君剪舌

山魃一足

敬愛寺僧

集異記

孤鶴中箭

平等閣

盜發蕭王墓

白龍

集翠裘

王維登第

伶妓誦詩

張鎰拜相

山魃報冤

狄公妙針

王積新聞婦姑圍棋

錄異記

文昌入相禹錫方轉本曹

玄元像

沙蟲

蠱毒

青猪鷲獸

漢江魚

卓異記

誅三賊同月日

元振二親存

三世為相

三拜中書

起家三年拜相

舍人拜侍郎

乘異記

天水碧

道士唱感庭秋詞

陶穀換眼

李昱為師子國王

秦婦罰為牝羊

桐葉題詩

龍有雄雌

化鶴丹

秘閣壁詩

蠶飛

王生不食

類說目錄

欽定四庫全書

類說卷八

宋 曾慥 編

述異記

盤古氏

天地萬物之祖也其死也頭為五岳目為日月脂膏
為江海毛髮為草木一云頭為東岳腹為中岳左臂
為南岳右臂為北岳足為西岳一云泣為江河氣為
風雷喜晴怒陰

鬼母

南海小虞山中有鬼母一產千鬼朝產之暮食之今
蒼梧神有鬼姑神是也虎頭龍足蟒目蛟眉

龜歷

陶唐之世越裳國獻千歲神龜背上有科斗書記開
闢以來帝令錄之號龜歷

走山泣石

桀時泰山走石泣周武王謂周公曰桀為不道走山

泣石

堯時十瑞

堯時宮中芻化為禾鳳凰止庭神龍見沼歷草生階
禽五色鳥化白神禾生庖簋莆生厨景星耀天甘露
降地是為十瑞

堯碑禹碣

崆峒山中有堯碑禹碣皆籀文述帝功德

斑竹

舜南巡葬于蒼梧堯之二女娥皇女英泪下沾竹竹
悉為之斑

相思木

魏苦秦之難民從征不返妻思而卒塚上生禾枝葉
皆向夫所在而傾因號相思木今秦趙間有相思草
狀似石竹一名斷腸草

懶婦魚

淮南有懶婦魚昔楊氏婦為姑溺死化魚其膏可燃

燈燭照鳴琴博奕則有光照紡績則不明

龍綃宮

南海有龍綃宮泉客織綃之處

女珊瑚

光武時南海貢珊瑚婦人帝植于殿前號女珊瑚靈
帝時樹死漢將亡之兆也

應龍

水虺五百年為蛟蛟千年化為龍龍五百年為角龍

又五百年為應龍

玄鹿

鹿千年化為蒼又五百年化為白又五百年化為玄
漢成帝時中山人得玄鹿烹之骨皆黑色仙者云玄
鹿為脯食之壽二千歲

靈龜

靈龜二千年生毛壽五千年曰神龜萬年曰靈龜

虎千年則牙蛻而角生

附錄

封邵化虎

漢宣城守封邵化為虎食郡民時語曰無作封使君
生不治民死食民

梟獍

梟獍之為獸狀如虎豹而小始生還食其母故曰梟
獍

金鷄玉犬

濟陽山有麻姑登仙處山上有金鷄鳴玉犬吠

金蠶玉燕

闔閭夫人墓中金蠶玉燕各千餘隻

吳王春霄宮

吳王夫差立春霄宮為長夜之飲造千石酒鍾又作
天池池中造青龍舟日與西施為水嬉又有別館在
句容楸梧成林古樂府云梧宮楸吳王愁是也

射堂

吳王射堂柱礎皆如伏龜袁宏宮賦云海龜之礎是

也

孝竹頌

漢章帝三年子母笋生白虎殿前時謂孝竹羣臣獻

孝竹頌

橘籍

越多橘柚歲多橘稅謂之橙橘戶亦曰橘籍又有王氏橘園胡氏梅山賀氏查丘

白蓮斑竹

吳中有陸家白蓮顧家斑竹趙有韓氏之酸棗

脂粉塘

吳故宮有香水溪俗云西施浴處人呼為脂粉塘

磨鏡石

鏡湖俗傳軒轅氏鑄鏡於此今有磨鏡石石上不生

蔓草

却塵犀

却塵犀海獸也其角辟塵

玄鶴中箭

噲參養母至孝有玄鶴中箭參收養療治瘡愈放之
後鶴雌雄雙至夜銜明月珠為謝

玉女搥練砧

瑯琊郡山有方石神女於此搥衣號玉女搥練砧
神人驅石

始皇作石橋海上欲觀日出有人驅石去不速神人
鞭之流血今石橋色猶赤

五色蛾

園客濟陰人種五色香草十餘年服食其實常有五色蛾集草上至蠶時有一女來助養蠶得蠶一百二十枚大如甕每一繭繅六七日方盡女與客俱成仙去

妬女泉

并州妬女泉婦人靚粧絲服至其地必興雲雨一名是介推妹

爛柯

信安郡石室山晉時王質伐木至見數童子棋與質
一物如棗核含之不覺飢視斧柯爛盡既歸無復時
人

螺亭

南康有女採螺為業夜宿亭上聞風雷聲見衆螺張
口而至亂散其肉明日唯有骨在焉故號其亭曰螺
亭

七尺棗三尺梨

北方有七尺棗南方有三尺梨人或見而食之即為

地仙

黃鶴樓

荀環游江夏黃鶴樓上望西南有物飄然而來乃駕
鶴之客也羽衣虹裳賓主歡對已而辭去跨鶴騰空
渺然而滅

白衣素女

晉安書生謝端海岸得一大螺大如一石米斛割之
中有美女曰予天漢中白衣素女天帝憐君能正令
為君婦端以為妖訶之女歎息升空駕雲而去

秦獄地

甘泉道中有蟲頭目口齒悉具東方朔曰此古秦獄
地也積憂所致上使按圖果秦獄地朔曰積憂者得
酒而解取蟲置酒中立消

活人草

漢光武時月支國獻活人草人死以草覆面則活

龍肝瓜

長一丈生于冰谷

慈竹

南中生子母竹今之慈竹也

獬豸

一角羊也性知人有罪臯陶治獄其罪疑者令羊觸之

猿獾

猿五百歲化為獾獾千歲化為老人燕千年生胡髯

龜生毛

殷紂時大龜生毛而兔生角兵甲將興之兆

天雨金等物

夏禹時天雨金三日周成王時咸陽雨金王莽宮中
雨五銖錢至地為龜漢翁仲孺家貧天雨金十斛於
其家漢惠帝宮中雨黃金黑錫呂后時雨粟宣帝時

江南飢饉雨穀三日秦魏地雨穀二千頃成帝時宮
中雨一蒼鹿大禹時天雨稻古詩云安得天雨稻飼
我天下民吳桓王時金陵雨五穀於貧民家魏時鄴
中雨五色石河內雨棗河間王子元家雨有小兒八
九枚墮於庭前自言家在河東為風所飄至周秦間
河南雨棗酸棗縣是也

麥化飛蛾

晉永嘉中梁州雨下日麥盡化為飛蛾又荊州久雨

粟化為蟲中郎王義奏曰蛾麥與蟲粟陛下自以聖德何如帝有慙色

水木之精

漢武未央宮梁上一老翁長八九寸僂步至帝前叩頭不言仰視屋俯視帝脚忽不見帝駭懼東方朔曰水木之精也陛下大興宮室斬伐其居故來訴耳仰視屋而後視陛下脚足者願宮室足於此不更造帝乃息役後帝幸瓠子河聞水底絃歌聲前梁上翁凌

波而出帝曰向所聞樂是公等奏耶對曰以前歸訢
蒙陛下息斤斧得全其居故相慶樂耳遂奏樂獻洞
穴赤蚌明珠

離合風

列禦寇御風而行常以立春日歸于八荒立秋日遊
于風穴風來則草木皆生去則草木搖落謂之離合
風

蜃如猪羊

秦繆公時陳倉人掘地得物狀如猪羊繆公逢二童子曰此名蝮在地中食死人腦若以栢葉穿其首則死故今種栢在墓上以防其害也

三十六洞天

人間三十六洞天知名者十耳餘出九微志未行於世

鮫室

南海中有鮫人室居水如魚不廢機織其眼能泣則

出珠

神鉦

洞庭山有石樓樓下兩石叩之其聲響如鉦因號神

鉦

天雞

桃都山有桃都樹上有天雞天雞鳴則人間雞鳴

香尉

漢雍仲進南海香拜洛陽尉號香尉

水精宮

閻闔造水精宮

金李

杜陵有金李中山有縹李其大如拳一李二色

辟寒香

漢武外國貢辟寒香室中焚之雖大寒人必減衣

續水

澠渙二水其波文皆五色名文章水一曰續水

迷穀

有穀如楮實佩之令人不饑號迷穀

懶婦草

桂林有睡草見之令人睡一名醉草又曰懶婦草

驚精香

聚窟洲有返魂樹伐其根心玉釜中煮汁名驚精香

死屍聞氣即活

紫萱

萱草一名療愁花一名紫萱又曰忘憂草

仙人杏

天台山有杏花六出而玉色號仙人杏

靈楓

南中有楓子鬼楓木之老者為人形亦曰靈楓

鸞歌鳳舞

南海有軒轅丘鸞歌鳳舞天帝樂也

蛟妾

夏桀宮中有女子化為龍俄復為女子甚麗而食人
桀命為蛟妾告桀吉凶

廣異記

掘太歲地

晁良正性剛不怖鬼每年常掘太歲地後又掘忽見
一肉物良正打之三百送于河其夜使人視之三更
後車馬甚衆來至肉所問太歲兄何故受此屈辱不
讐報之太歲云彼正榮盛無奈之何明失所在

囚父報德

乾元中張守一為大理少卿平反折獄死囚出免者甚多後有白頭老人詣前拜謝曰某非生人明公所出死囚之父也無以報德儻有切身之求或能致耳俄有詔賜酺城中縱觀守一見士人家女甚美悅之計無從出試呼前鬼能為我致否鬼曰此易事然不得久纔可七日而已遂營靜處設帷帳有頃而至女驚曰此何處守一及鬼在傍給云此是天上因與款

昵情愛甚切至七日鬼復掩其目送還守一私覘女
家云女郎卒中惡不識人七日而醒

猿狗為怪

魏元忠未達時家貧獨有一婢方爨見老猿為看火
婦驚白元忠元忠曰猿愍我無人為我執爨甚善又
嘗呼蒼頭未應狗代呼之又曰此孝順狗也乃能代
我勞又獨坐有羣鼠拱手立其前又曰當飢就我求
食乃令食之夜中鵩鵒鳴屋端家人將彈之又止之

曰鵲鷗畫不見物故夜飛此天地所育不可使南走
越北走胡何得傷之絕無怪

富貴正由蒼蒼

魏元忠微時謁張景藏待之甚薄就質通塞亦不答
乃大怒曰僕千里裹糧而來非徒爾也必謂有以見
教乃金口木舌以相遇富貴正由蒼蒼何預公事因
拂衣而去景藏遽止之曰君相正在怒中後富貴極
人臣卒如其言

銀坑龜

劉彥回父為湖州刺史有下僚銀坑得一龜長一尺
持獻刺史羣官畢賀云得此龜壽千歲使君謝已非
其人自騎馬送龜却至坑所放之後刺史亡彥回為
房州司士之官屬山水泛溢平地盡淹沒一家惶懼
俄有大龜引路隨龜而行悉是淺處歷十餘地得免
水難其夕彥回夢龜云昔在銀坑蒙先使君之惠故
此報恩

芝圃

仙都有芝圃悉種靈芝或如車騎或如華蓋或如樓閣或如飛鳥五色

仙洞樗蒲

有人乘馬山行見洞中二老樗蒲乃以鞭拄地而觀俄忽鞭爛而鞍朽

金羊玉馬

有積雪久不消掘地得金羊玉馬高二尺許

王弼守門

辰州有人射猪遂入石室見老翁問何射猪對以傷
禾翁即呼一童子責之何不謹門令猪出射者問何
人童子曰此河上翁帝使為諸仙講易我即王弼受
易未通遂罰守門

摩頂松

玄奘往西域見一松以手摩其枝曰吾西去求佛教
汝可西長吾歸即東回俾吾弟子輩知之既去松枝

年年西指一年忽東回弟子曰教主歸矣已而果還
至今謂之摩頂松

許旌陽斬蛟劍

武勝之於江灘見雷公逐一黃蛇或以石投之鏗然
有聲雷公飛去得一銅劍有文云許旌陽斬蛟第二
劍

玉英粉

原闕
神降詩

蟹螯

老人吹笛

以上並原闕

道君剪舌

夔州道士王法朗舌長呼字不正乃日誦道德經忽夢老君剪其舌既覺語遂正

山魃一足

山魃嶺南皆有一足反踵手足皆三指雄曰山丈雌曰山姑夜叩人門雄求金繒雌求脂粉

敬愛寺僧

開元初岐王範以無子求道士葉靜能奏天曹令取敬愛寺僧為子鬼誤至聖善寺大德房大德云我修

堯率天業不當為貴人作子當是敬愛寺僧某乙耳
鬼遂不取後一年岐王生子自幼來敬愛寺禮拜及
年十餘竟不行善唯好持彈彈寺院諸鵠迨盡耳

集異記

孤鶴中箭

明皇獵沙苑雲間有孤鶴上親御弧矢一發而中鶴
帶箭西南而逝益州明月觀青城道士徐佐卿一日
忽自外至曰吾行山中偶為飛矢所加尋已無恙此

箭非人間所有吾留壁上後年箭主到此即宜付之
仍記月日明皇幸蜀至此觀深異之佐御所題乃沙
苑從畋之日也蓋孤鶴中箭耳

平等閣

隋開皇中釋子澄空於晉陽鑄鐵像高七十尺二十
年物力乃辦啓爐之日其像無成澄空復堅前約後
二十年瀉像又無成呼天哀哀叩頭請罪又二十年
功力復集大會邇遐澄空登爐巔百尺曰吾少願鑄

大佛今年八十兩已不成此更違心吾亦捨命像或
圓滿後五十年吾建重閣俄金液注射澄空投身而
入開爐鐵像端妙自是并州人思起閣覆之工用甚
大開元初李嵩充天平節度使施錢七萬緡而重閣
成今平等閣是也計僧死像成之日至嵩正五十年
得非澄空後身歟

盜發蕭王墓

蕭穎士濟瓜洲中有二少年曰此人甚肖都陽忠烈

王頴士云是曾孫二人曰吾識而祖久矣勿遽負擔
而去明年止盱眙邑長之署有吏擒獲發塚墓賊五
六人江中二少年在焉頴士曰二人非仙則神具述
曩事邑長窮之伏云我嘗開鄱陽王塚大獲金玉當
門有貴人僵臥如生與頴士無異我豈有他術哉嘗
聞人之紹續三五世必有一人肖其祖先斯豈驗歟

白龍

元和中韋宥出牧温州江岸刺舟以行淺沙亂流蘆

枝有新絲箏絃宥拔蘆伸絃其長倍尋應手復結宥
付箏伎既而蜿蜒舒展少頃蠕蠕搖動雙眸瞭然宥
駭曰得非龍乎焚香致敬投于江流風浪皆作蒸雲
走電咫尺昏晦有白龍長百餘丈擎攫升天良久乃
滅

集翠裘

則天時南海貢集翠裘后以賜張昌宗狄仁傑入奏
事命與昌宗雙陸則天曰賭何物梁公曰賭昌宗毛

裴以臣紫絕袍為對則天曰此裴價逾千金梁公曰臣袍乃大臣朝見之衣昌宗乃嬖倖寵遇之服對臣之袍臣猶怏怏昌宗神沮氣索累局連北公對御褫裴拜恩而出及光範門遂付家奴衣之縱馬而去

王維登第

王維文章得名性嫻音律岐王重之維將應舉有張九臯出入九公主門為牒京兆試官令作解頭岐王謂維曰子詩清越者可錄十篇琵琶新聲可度一曲

同詣主第諸伶旅進維立前行獨奏新聲主曰此曲
何名曰鬱輪袍因出詩卷主曰皆我素誦習謂是古
人佳作乃予為之乎令更衣升坐右主曰使京兆今
年得此生為解頭誠為國華曰已承貴主諭託九臯
主曰本為他人所託乃為維名試官傳諭維遂一舉
登第

伶妓誦詩

開元中詩人王昌齡高適王渙之共詣旗亭小飲有

梨園伶官聚燕四妓繼至皆名部也昌齡等曰我輩
擅詩名未定甲乙可觀諸伶所唱詩多者則優一伶
唱昌齡二絕云寒雨連江夜入吳平明送客楚帆孤
洛陽親友如相問一片冰心在玉壺奉帚平明金殿
開強將團扇更徘徊玉顏不及寒鴉色猶帶昭陽日
影來一伶謳高適絕句云開篋淚沾臆見君前日書
夜臺何寂寞猶是子雲居渙之曰樂人所唱皆下俚
之詞佳妓所唱如非我詩終身不敢與子爭衡脫是

吾詩子等當列拜牀下須臾佳妓曰黃河遠上白雲
間一片孤城萬仞山羌笛何須怨楊柳春風不度玉
門關渙之揶揄二子曰田舍奴我豈妄哉諸伶不喻
其故競拜曰俗眼不識神仙乞降就筵三子從之酣
醉終日

張鎰拜相

代宗面許張鎰宰相忽夢曰任調拜相鎰思中外初
無此人外甥李通禮曰任調是反語饒甜饒甜無如

甘草獨為珍藥珍藥反語即舅名氏俄報白麻下公

果拜平章事

珍枕鎮賁張
央養樣樂鑑

山魈報冤

蕭山令韋知微縣多山魈前後官吏事之如神知微
焚殺殆盡忽有蕭造來謁曰峽州得猴雛可玩乃出
小合有猴如栗大俄化為虎闔門皆啗無孑遺

狄公妙針

狄梁公性嫻醫藥尤妙針術顯慶中應制入關路旁

大榜云能療此兒酬絹千疋有富室兒鼻端生贅如
拳石綴鼻根蒂如筋痛楚危亟公為腦後下針疣贅
應手而落其父母輦千緡奉焉公不顧而去

王積新聞婦姑圍棋

翰林樞密王積薪從明皇西幸寓宿深溪之家但有
婦姑止給水火纔暝闔戶積薪聞姑謂婦曰良宵無
以為適與汝同圍棋可乎堂內無燭婦姑各在東西
室婦曰起東五南九置子矣姑曰東五南十二置子

矣婦曰起西八南九置子矣姑曰西九南十置子矣
夜及四更其下止三十六姑曰子已北矣吾止勝九
枰耳遲明請問于妯娌顧婦曰是子可教以常勢耳
婦乃指示攻守殺奪應拒防救之法甚畧妯曰止此
已無敵於人間矣積薪行至數步回顧已失向之室
廬自是其伎絕倫竭心較九枰之勢終不能得因名

鄧艾開蜀勢

史遺
亦載

錄異記

文昌入相禹錫方轉本曹

段文昌負才傲俗江陵街有大第門枕流渠公乘醉
曰我作江陵節度使必買此宅聞者皆笑其狂後果
鎮荆南遂買此宅又嘗佐韋臯為成都巡官忽失意
使攝靈池尉奔迫去縣六七里已昏黑路絕行人忽
有兩炬前引更呼曰太尉來及郭門炬滅劉禹錫先
為禮部員外有日者曰員外遷轉殊遠十年後段公
入相方轉本曹正郎自是禹錫連授外官十餘年文

昌入相方除禹錫禮部郎中

玄元像

金星之精墜於終南圭峰之西因號太白山其精化
為白石有紫氣覆之玄宗立玄元廟於長安夢神人
曰太白玉石可琢為像上遣使掘獲玉石琢為玄元
像高二丈許為二真人二侍童及李林甫陳希烈之
形高六尺以來

沙虱

潭袁等州有沙虱即毒蛇鱗中虱也細不可見夏月
蛇為虱所苦倒身江灘急溜處水刷其虱或卧沙中
碾虱入沙行人中之如針孔粟粒四面有五色文即
其毒也得術士禁之剋去少肉即愈不然三兩日即
死矣

蠱毒

水弩之蟲狀如蜚螋黑色八足尾長數寸即弩也自
四月一日上弩八月卸之見人影則射中影之處身

有瘡腫與沙虱之毒同矣速須禁氣剋去毒肉復有
蠱毒凡入蠱毒家預告主人曰汝家有蠱毒不得容
易害我如此則毒不行矣

青猪驚獸

黃萬祐修道黔南蜀王建迎入宮問其年齒則曰吾
只記夜郎侯王蜀之歲蠶叢氏都郫之年時被請出
耳後烏兔交馳花開花落不記甲子後堅辭歸山既
去於所居題曰莫教牽動青猪足動即炎炎不可撲

鷙獸不欲兩頭黃色即其年天下哭至乙亥年宮內
延火帑藏並煨燼乃知太歲乙亥為青猪焚爇之期
後歲在戊寅土而建殂寅為鷙獸干與納音俱是土
是以言兩頭黃

漢江魚

唐桓君旅于漢江勒要潭得魚長數尺有字云三度
過海二度上漢行至勒潭命屬於桓君

卓異記

金史卷八
卷八
誅三賊同月日

憲宗元年十一月一日斬劉闢二年十一月一日斬
李錡十二年十一月一日斬吳元濟誅三賊同月同
日

元振二親存

李邕撰郭元振行狀云自唐宰相二親存者唯元振
一人

三世為相

張嘉貞子延賞賞子宏靖嗣為宰相

三拜中書

張說三拜中書始終無玷自古未有

起家三年拜相

張鎬一命左拾遺二命右補闕三命試御史四命諫議大夫五命中書侍郎平章事起家三年秉政自古未有

舍人拜侍郎

張說子鈞孫濛三代自中書舍人拜侍郎

乘異記

天水碧

李後主末年宮人競服碧衣取靛花盛天雨水澄而染之號天水碧

道士唱感庭秋詞

蜀有狂道士詣紫極宮謁杜光庭先生求安泊朝夕飲醉謳歌感庭秋詞一夕燈燭熒煌列席甚盛道士

正坐二青衣童侍立光庭窺戶曰識度凡淺不料上
仙降監匍匐門下翼拜光靈道士曰何辱先生勤學
如此乃令二童收拾筵具摺揲之隨手而小如符子
狀又將二童合為一木偶可寸許悉納冠中乃啓戶
光庭欣然而入已無見矣但四壁焉

陶穀換眼

陶穀少時夢數吏云奉符換眼吏附耳求錢十萬安
第一眼穀不應又云錢五萬安第二眼復不答吏曰

止安第三眼即以二彈丸納眼中既覺眼色深碧後
有善相道士陳紫陽曰好貴人貴氣奈一雙鬼眼何
必不至大位

李昱為師子國王

賈黃中守金陵恍惚有人展刺云前國王李昱祇謁
既見乃清瘦道士也賈知其意乃曰太師安得及此
李曰某幼擇釋氏未至通達誤有所見今為師子國
王適思鍾山故來相見懷中取詩授賈忽然不見詩

曰異國非所志煩勞殊未閒風濤千萬里無復見鍾
山載閱之隨手灰滅

秦婦罰為牝羊

劉道芳為蓬溪令秩滿歸京夜宿縣界富民秦氏忽
見一紅裳婦人泣曰妾本秦氏子婦夫媚市一妾性
剛不相下遂為兒鞭撻而死其妾訴于陰府追攝兒
已償命餘業罰為牝羊今在秦氏之欄以員外經過
將烹為饌念為羊固甘忍死腹中有羔就烹其業轉

甚候婉就死無恨道芳戒主人出致意云私忌不茹
葷血切勿烹宰遲明有人出告之笑曰適已烹羊道
芳嘆訝告以夜來之事秦氏舉家感傷內其羔于腹
中瘞之

桐葉題詩

張士傑客壽陽被酒歷淮濱入龍祠見後帳龍女塑
像甚美乃於桐葉題詩投帳中曰我是夢中傳彩筆
書於葉上寄朝雲忽見含有美女士傑遂詣置酒女

吟曰落帆且泊小沙灘霜月無波淮上寒若向江湖
得消息為傳風水到長安士傑昏醉既醒孤坐于廟
門之石小女奴曰娘子傳語還君桐葉勿復置念

龍有雄雌

劉涓子微善畫龍一日有夫婦造門曰龍有雄雌其狀
不同雄者角峭浪凹目深鼻豁鬣大鱗密上壯下殺
朱火熒熒雌者角靡浪平目肆鼻直鬣圓鱗薄尾壯
於腹洞微聳然曰何以知之其人曰身乃龍也化為

雙龍飛去

化鶴丹

許遜有幻術每為人燒丹必厚取以市藥造爐俾其
人自守之每燒以四十九日成將成必有犬逐猫觸
其爐破有雙鶴飛去每每如此人呼化鶴丹

秘閣壁詩

淳化中秘閣上高壁有詩一聯云涼風送炎去庭樹
葉齊落後月餘宋炎葉齊齊直舒俱以事出

蠶飛


端拱中常潤民蠶大眠起後一旦有蟲如蝗翳日而飛過江北去有力不及而墮者乃蠶也是年通泰民家蠶有獲數十倍者後吳中大饑民死大半

王生不食

張生京城賊功也有王山人者往來洽熟知不食烟火已五十年張求之王以二物鋪三貼併服二日初一日覺甚饑慎勿思食二日猶饑不可念食三日後

即永不食矣生服之果應數年後忽見王生氣息羸弱生哀之曰吾兄絕食之久何有此病王曰藥毒因循不曾解之故也君他日藥自發亦當如是生欲藥無發王曰歸飡葵羹服巴豆腹中之藥後可無患生歸服之下泄數日其臭皆香後下黃脂一塊光瑩中有小孔可容釵股乃通氣上下往來之所凡下三塊即曩日所鋪二物也後忽逢王君顏采如舊生喜問之云是前藥之功即不解亦不至害人生大追悔乃

悟王生見試也



類說卷八

欽定四庫全書

子部
類說卷十九

詳校官中書_臣張姚成

員外郎_臣牛稔文覆勘

總校官檢討_臣何思鈞

校對官典簿_臣劉景岳

謄錄監生_臣何銓

欽定四庫全書

類說目錄

卷九

仇池筆記上

論文選

日月蝕

八陣圖詩

陽關三疊

三殤

中宮太乙

不忮之誠信於異類

磨蝎為身宮

治目治齒

老子解

三豪詩

萬花會

弄獼猴

治大風方

酒名

論詩

禁同省往來

劉原父語

溪洞畫李師中像

韓玉汝李金吾

舒公封荆公

以意改書

書秋雨詩

杜子美詩

子美詩外尚有事在

孟郊詩

白樂天詩

成相

擬作

薑多食損智

石墨

桃笙

池魚

耳白於面

如夢詞

論物理

木蠹

小兒吸蟾蜍氣

奴為崇

附語

晉人書

隱者楊朴

古鏡

剖桃核得雄黃

研光帽

戴嵩鬪牛

鵝有二能

戒殺

論醫脉之難明

黎稼子

服井花水

費孝先卦影

看茶啜墨

正獻公焚聖語

賈婆婆

世有顯人

論柳宗元

論金土同價

青苗錢

巫蠱

字謎

論墨

佛菩薩語

李赤詩

論茶

魯直詩文

論漆

二紅飯

大禹周公

類說目錄

欽定四庫全書

類說卷九

宋 曾慥 編

仇池筆記上

論文選

舟中讀文選恨其編次無法去取失當齊梁文字衰
陋蕭統尤為卑弱如李陵五言皆偽今日觀淵明集
可喜者甚多而獨取數篇淵明作閒情賦正所謂國
風好色而不淫正使不及周南與屈原所陳何異而

統大譏之此小兒強解事也

三殤

李善註文選本末詳備所謂五臣者真俚儒荒陋者也詠張子房詩云苛慝暴三殤此禮所謂上中下三殤言秦無道戮及幼稚而註乃引苛政猛於虎吾父吾夫吾子皆死謂夫謂父為殤此類甚謬

日月蝕

玉川子月蝕詩以蝕月者月中蝦蟆也梅聖俞作日

蝕詩云食日者三足烏也此因俚說以寓意也戰國策日月暉於外其賊在內則俚說亦當矣

中宮太乙

杜子美詩曰自平宮中呂太乙世不曉其義而妄者以為唐有自平宮偶讀玄宗實錄有宮人呂太乙叛於廣南杜詩云自平宮中呂太乙下文有海南收珠之句見書不廣輕改文字鮮不為笑

八陣圖詩

予嘗夢杜子美云世人誤會八陣圖詩江流石不轉
遺恨失吞吳以為先主武侯欲與關侯復仇故恨不
滅吳非也我意以為吳蜀唇齒之國不當相圖晉能
取蜀者以蜀有吞吳之意此為恨耳

不忮之誠信於異類

予少時書室前竹栢雜花衆鳥巢其上武陽君惡殺
生婢僕不得捕取數年間鳥有巢於低枝其雛可俯
而窺也此無他不忮之誠信於異類

陽關三疊

舊傳陽關三疊歌者每句再疊而已若通一首又是
四疊皆非是每句三唱以應三疊則叢然無復節奏
有文勛者得古本陽關每句皆再唱而第一句不疊
乃知唐本三疊如此樂天詩云相逢且莫推辭酒聽
唱陽關第四聲注云勸君更盡一盃酒以此驗之若一
句再疊則此句為第五聲今為第四則第一句不疊審矣
磨蝎為身宮

韓退之詩云我生之辰月宿南斗乃知退之磨蝎為身宮予以磨蝎為命宮平生多得謗毀殆同病也

治目治齒

張文潛曰病目忌點洗目有病當存之齒有病當治之治目如治民治齒如治軍治民如曹參之治齊治軍如商鞅之治秦

老子解

子由寄老子新解使戰國時有此書則無商鞅韓非

使漢初有此書則孔老為一晉宋間有此書則佛老
不為二

三豪詩

石介作三豪詩云曼卿豪於詩永叔豪於史杜默師
雄豪於歌永叔亦贈默詩云贈之三豪篇而我濫一
名默歌少見於世有云學海波中老龍夫子門前大
蟲皆此類語永叔不諛者此公惡爭名且為介諱也
默豪氣正是京東學究飲私酒食瘴死牛肉醉飽後

所發也作詩狂恠至盧仝馬異極矣若更求其人便作杜默矣

萬花會

揚州芍藥為天下冠蔡京為守始作萬花會用花十餘萬枝既困諸邑吏緣為奸予首罷之萬花本洛師故事亦為民害錢惟演作留守始置驛貢洛花有識鄙之此宮妾愛君之意也

弄猢猻

陳敦云猢猻作人服折旋俯仰中度細視之其相侮慢也甚矣人言弄猢猻不知人為猢猻所弄此言頗有理

治大風方

王游元龍云孫子飛有治大風方極驗常以施人一日夢人云天使此病人君違天怒若施不已君當得此病藥不能救子飛懼遂不施僕以為天之所病不可療耶則藥不應有效藥有效者則是天不能病當

是病之祟畏是藥而假天以禁人耳子飛不察為鬼
所脇予則不然若病者得愈願代受其苦家有一方
能下腹中穢惡今當常以施人

酒名

退之詩云且可勤買拋青春國史補云酒有郢之富
春烏程之若春滎陽之土窟春富平之石凍春劍南
之燒春杜子美云聞道雲安麴米春裴鉶傳奇亦有
酒名松醪春乃知唐人名酒多以春

論詩

唐末五代文物衰盡詩有貫休齊己書有亞栖村俗
之氣大率相似蘇子美有張長史書云隔簾歌已俊
對坐貌彌精語既凡惡而字法真亞栖之流曾子固
編李白集有贈懷素草書歌及笑已乎數首皆貫休
齊己辭格二子號有知識者故深可恠如白樂天贈
徐凝退之贈賈島皆世俗無知者所託不足多恠

禁同省往來

元祐元年余為中書舍人執政患省事多漏泄欲於
舍人廳後作露籬禁同省往來余曰執政應須簡要
清通何必樹籬插棘諸公笑而止明年竟作之暇日
偶讀白樂天詩有西省北院新建小亭種竹開牕東
通騎省與李常侍隔牕小飲作詩乃知唐時得西掖
作牕以通東省而今日本省不得往來可嘆也

劉原父語

劉原父嘗酒酣云陳季弼告陳元龍曰遠近之論謂

明府奚而自驕元龍曰閨門雍穆有德有行吾敬陳
元方兄弟淵清玉潔有禮有法吾敬華子魚清修疾
惡有識有義吾敬趙元達博聞強記吾敬孔文舉雄
姿傑出吾敬劉玄德所敬如此何驕之有餘子瑣瑣
何足錄哉因仰天太息此原父之雅趣也吾嘗作詩
云平生我亦輕餘子晚歲人誰念此翁記原父語也
原父沒尚有貢父在每語強人意今復死矣何時復
見此俊傑人乎悲夫

溪洞畫李師中像

郭祥正從章惇入梅山溪洞中見洞王蘇甘家有畫像事之甚嚴云桂府李大夫也問其名曰此豈可名哉叩頭稱死罪數四卒不敢名徐考其年月則李師中誠之也嘗為提刑權桂府爾

韓玉汝李金吾

韓縝為秦州以賊殺不辜去官秦人語曰寧逢乳虎莫逢韓玉汝孫臨最滑稽或問莫逢韓玉汝當以何

對臨曰何怕李金吾

舒公封荆公

王介甫先封舒公改封荆公詩曰戎狄是膺荆舒是懲識者云宰相不學之過也

以意改書

近世人輕以意改書鄙淺之人好惡多同從而和之使古書日就訛舛孔子曰吾猶及史之闕文也蜀本莊子云用志不分乃疑於神此與易陰疑於陽禮使

人疑汝於夫子同今四方本皆作凝陶潛詩採菊東
籬下悠然見南山採菊之次偶然見山境與意會今
皆作望南山杜子美云白鷗沒浩蕩蓋滅沒於烟波
間而宋敏求云鷗不解沒改作波二詩改此兩字覺
一篇神氣索如也

書秋雨詩

杞人馬正卿書子美秋雨嘆一篇壁上初無意也正
卿即日辭歸不出至今白首固窮守節

杜子美詩

余在岐山見秦州進一馬駝如牛項下重胡倒立毛
生肉端蕃人云此肉駝乃知鄧公驄馬肉駝礮礮連
錢不當作肉駝悲陳陶云四方義士同日死此房琯
之敗也唐書作陳濤未知孰是琯既敗猶欲持重有
所伺而中人促戰遂大敗故後篇云焉得附書與我
軍忍待明年莫倉卒北征詩云桓桓陳將軍仗鉞奮
忠烈謂陳元禮也佐玄宗平內難又從幸蜀建誅國

忠之策洗兵馬云張公一生江海客謂張鎬也明皇
雖誅蕭至忠長懷之侯君集云蹭蹬至此至忠亦蹭
蹬者耶故杜子美亦哀之云赫赫蕭京兆今為時所
怜後出塞詩云我本良家子出師亦多門躍馬三十
年恐負明主恩坐見幽州騎長驅河洛昏中夜間道
歸故里但荒村惡名幸脫免到老無兒孫詳味此詩
蓋祿山反時其將有脫身歸國而祿山殺其妻子不
出姓名可恨也憶昔詩云關中小兒壞紀綱謂李輔

國也張后不樂上為忙謂肅宗張皇后也為留猛士
守未央謂郭子儀奪兵柄入宿衛也

子美詩外尚有事在

杜子美自許稷與契人未必許也然其詩云舜舉十六
相身尊道何高秦時用商鞅法令如牛毛此是稷契
輩人口中語也又云知名未足稱局促商山芝又云
王侯與螻蟻同盡隨丘墟願聞第一義回向心地初
乃知子美詩外尚有事在也

孟郊詩

歐永叔云孟郊詩鬚邊雖有絲不堪織寒衣就使堪
織能得多少

白樂天詩

白樂天為王涯所讒謫江州司馬甘露之禍樂天有
詩云當君白首同歸日是我青山獨往時不知者以
為幸亡樂天豈幸人之禍者哉蓋悲之也

成相

孫卿子書有韻語者其言鄙近多云成相莫曉其義
前漢藝文志詩賦類中有成相雜詞十篇則成相者
古謳謠之名也疑所謂喪春不相者又樂記云治亂
以相相字亦恐由此得名

擬作

劉子玄辯文選所載李陵與蘇武書蓋齊梁文士擬
作予因悟陵與武五言亦後人擬作列女傳蔡琰二
詩其詞明白感慨頗類木蘭詩東京無此格也建安

七子猶含蓄不盡發見况伯喈女乎琰之流離必在父沒之後董卓既誅伯喈乃遇禍此詩乃云董卓所驅虜入胡尤知其非真也蓋范曄荒淺遂載之本傳薑多食損智

王介甫多思而喜鑿時出一新說已而悟其非又出一說以解之是以其學多謬嘗與劉貢父食曰孔子不撤薑食何也貢父曰言薑食多損智道非明民將以愚之孔子以道教人者故不撤薑食所以愚之也

介甫欣然而笑久之乃悟其戲也貢父雖戲言王氏之學實大類此

石墨

陸士衡與士龍書云登銅雀臺得曹公所藏石墨數
瓮今分寄一螺大業拾遺宮中以蛾綠畫眉亦石墨
之類也沈存中帥廊延以石燭作墨堅重而黑在松
烟之上曹公所藏豈此物耶

桃笙

柳子厚詩云盛時一失貴反賤桃笙葵扇安可常不知桃笙為何物因閱方言晉魏之間簟謂之笙乃悟桃笙以桃竹為簟也

池魚

眉州有人家畜數百魚深池中以磚砌四圍皆屋凡三十餘年一日天晴無雷池中忽發大聲如風雨魚皆躍起羊角而上不知所往舊說不以鼈守則為蛟龍所取予以謂蛟龍必因風雨疑此魚圈局三十餘

年日有騰拔之念精神不衰久而自達理或然耳
耳白於面

歐公嘗曰少時有僧相我耳白於面名滿天下唇不
着齒無事得謗其言頗驗耳白於面則衆所共見唇
不着齒余不敢問公如何也

如夢詞

泗州雍熙塔下浴戲作如夢令兩闕云水垢何曾相
受細看兩俱無有寄語揩背人盡日勞君揮肘輕手

輕手居士本來無垢又云自淨方能洗彼我自汗流
吁氣寄語澡浴人且共肉身遊戲但洗但洗本為人
間一切此本唐莊宗製名憶仙姿嫌其不雅馴改為
如夢令如夢如夢和淚出門相送取以為名云

論物理

舒州鑿人李惟熙善論物理云菱芡皆水物菱寒而
芡暖者菱花開背日芡花開向日故也又曰桃杏雙
仁輒殺人者其花本五出六出必雙草木花皆五出

惟柳與雪花六出此殆陰陽之理今桃杏六出雙仁
皆殺人者失常故也

木蠹

木實之蠹者必不沙爛爛者必不蠹而能浮不浮者
亦殺人嘗攷其理既沙爛散則不能蘊蓄而生蟲瓜
至甘而不蠹者以其沙也

小兒吸蟾蜍氣

富彥國在青社河北大饑民爭歸之有夫婦襁負一

子棄之道左空塚中而去後歸鄉過此塚欲取其骨
則兒尚活肥健於未棄時視之塚中有大蟾蜍如車
輪氣咻咻然意兒呼吸此氣故能不食而健自爾遂
不食年六七歲肌理如玉其父抱兒來京師以示小
兒鑒張荆筐張曰物之能蟄燕蛇蝦蟇之類是也能
蟄則不食不食則壽千歲若聽其不食不娶長必得
道父喜攜去今不知所在

奴為祟

石普好殺人未嘗慚悔醉中縛一奴使指使投之汴河指使哀而縱之既醒而悔指使畏其暴不敢以實告居久之普病見奴為祟自以必死指使呼奴示之祟不復見普亦愈

附語

世有附語者多婢妾賤人否則衰病不久當死者其聲音舉止皆類死者意有奇鬼能如是耶昔人遠行者取金釵藏壁中忘以語其妻已而病且死以告其

僕既而不死聞空中聲真其夫也曰吾已死爾如不信金釵在某所取得之遂發喪其後夫歸反以為鬼
晉人書

唐太宗購晉人書自二王以下近千軸皆在秘府武
后時為張易之兄弟所攘竊遂流落人間多在王涯
張延賞家涯敗軍人劫奪金玉軸而棄其書余於李
瑋都尉家見晉人數帖皆有小印涯字意其為王氏
物也有謝尚謝琨王衍等皆奇夷甫獨超然若羣鶴

聳翅欲飛而未起也

隱者楊朴

真宗東封訪天下隱者得杞人楊朴上問卿臨行有
人作詩否朴對曰臣妻一首云更休落魄耽盃酒切
莫猖狂愛咏詩今日捉將官裏去這回斷送老頭皮
上大笑放還山

古鏡

元豐中余自齊安過古黃州獲一鏡其背銘云漢有

善銅出白陽取為鏡清而明左龍右虎輔之其字如
菽大篆款甚精妙白陽疑白水之陽也其銅黑色如
漆照人微小古鏡皆然此道家聚形之法也

剖桃核得雄黃

岐亭王詡夢水邊見一人為人毆傷已死見詡而號
救之得免明日水邊見一鹿為獵者所得已中幾瘡
詡以數千贖之鹿隨詡起居未嘗暫捨詡所居茂林
一日有村婦林中見一桃過熟而絕大獨在木杪取

而食之棄其核謂大驚取而剖之得雄黃一塊如桃
仁乃嚼吞之甚甘美自是斷葷肉齋居一世不復殺
生

研光帽

徐倅李陶有子年十七八忽咏落花詩云流水難窮
目斜陽易斷腸誰同研光帽一曲舞山香父驚問之
若有物馮附者云西王母宴羣仙有舞者戴研光帽
帽上簪花舞山香一曲曲未盡花皆落去

戴嵩鬪牛

有藏戴嵩鬪牛者以錦囊繫肘自隨出與客觀旁一牧童曰鬪牛力在前尾入兩股間今畫鬪而尾掉何也黃筌見畫飛鴈頸足皆展者曰飛鳥縮頭則展足縮足則展頭無兩展者驗之信然

鵝有二能

錢塘人喜殺日屠百鵝余自湖上夜歸屠者之門百鵝皆號聲振衢路若有所訴鵝能警盜亦能却蛇其糞

殺蛇蜀人園池養鵝蛇即遠去有此二能而不能免死也又有祈雨之厄悲夫安得人如逸少乎

戒殺

水族痴暗人輕殺之或云不能償寃是乃欺善怕惡李公擇云雞無雄而卵者抱之雖能破殼而出不數日輒死此卵可食非殺也余曰凡能動者皆佛子也竹虱初如塗粉竹葉上久乃能動百十為曹無非佛子梁武水陸畫像六道外者以淡墨作人畜禽魚等

形罔罔然於空中乃是佛子流浪陋劣之極至於濕生如竹虱者猶不可得但若存若亡於冥間耳而謂水族雞卵可殺乎但起一殺念地獄已具不必在其能訴與不能訴也

論醫脉之難明

古今所病甚虛有盛候大實有羸狀疑似之間便有死生之異士大夫多秘所患以求診驗醫能否使索病於冥漠之中辨虛實冷暖於疑似之間醫不幸而

失終不肯自謂失也巧飾遂非以全其名間有謹愿者雖或因主人之言亦復參以所見兩存而雜治以故藥不効吾平生求醫蓋於平時默驗其工拙有疾求療必盡告以所患使醫了然知患之所在然後診之虛實冷暖主定於中脉之疑似不能惑也故雖中醫治吾疾常愈吾求疾愈而已豈以困醫為事哉

黎稼子

故人黎醇字希聲治春秋歐公喜之為人質木遲緩

劉貢父戲呼為黎稼子黎以為指其德不知果木實有是也一旦聯騎出鬧市有喝是果鬻者大笑幾落馬服井花水

時雨降多置器廣庭中所得甘滑不可名滌茶煮藥皆美而有益其次井泉甘冷者乾以九二化坎坤以六二為坎天一為水人能服井花水甘熱與石流黃鍾乳等非其人服之亦能發背腦為疽又分至日取水儲之後七日輒生物如雲母狀

費孝先卦影

至和元年成都人費孝先遊青城詣老人村壞其竹
床孝先欲償其值老人笑曰子視其下書云此床某
年某月日為費孝先所壞誠有數子何償焉孝先知
其異乃留師事之老人授以易範圍卦影後數年孝
先名聞天下四方治其學者所在而有皆自託於孝
先真偽不可知也

看茶啜墨

真松煤遠烟自有龍麝氣世之嗜者如滕達道蘇浩然呂行甫暇日晴暖研墨水數合弄筆之餘乃啜飲之蔡君謨嗜茶老病不能飲但把玩而已看茶啜墨亦事之可笑者也

正獻公焚聖語

杜正獻公為相蔡君謨孫之翰為諫官屢乞出仁宗曰卿等審欲得郡當具所欲奏來於是蔡除福州孫除安州正獻公曰諫官無故出終非美事乞且依舊

上可之退書聖語時陳恭公為執政不肯書曰吾初
不聞正獻懼遂焚之由此罷相議者謂正獻當明白
奏審不當遽焚其書也

賈婆婆

溫成皇后乳母賈氏宮中謂之賈婆婆賈昌朝結之
謂之姑姑臺諫論其奸吳春卿欲得其實而不可近
侍有進對者曰臺諫近日言事虛實相半如賈姑姑
事豈有是哉仁宗默然久之曰賈氏實曾薦昌朝非

仁宗盛德豈肯以實語臣下

世有顯人

李士衡之父豪恣不法誅死士衡進用王欽若欲言之而未有路會真宗論時文之敝因言路振文人也然不識體上曰何也李士衡父誅死而振為贈言曰世有顯人上領之士衡以故不大用

論柳宗元

敢為妄誕居之不疑呂溫為道州衡州及死二州之

人哭之逾月客舟之道于水者必呱呱然雖子產不至此溫何以得之其稱溫之弟恭亦賢豪絕人者又云恭妻裴延齡女也孰有士君子肯為延齡壻乎宗元與伾文交蓋亦不差於延齡者也

論金土同價

齊高帝云當使金土同價意則善矣然物豈有此理哉孟子曰物之不齊物之情也巨屨小屨同價人豈為之哉孟子亦自忘此言為菽粟如水火之論金不

可賤如土猶土不可貴如金也堯之民比屋可封桀之民比屋可誅若信此說則堯時諸侯滿天下桀時大辟徧四海也

青苗錢

儋耳進士黎子雲言城北有唐村老人曰允從者問子雲宰相何苦以青苗錢困我於官有益乎子雲言官患民貧富不均富者逐什一益富貧者取倍稱至鬻田質口故為是法以均之允從曰貧富不齊自古

已然雖天公不能齊也民有貧富猶器有厚薄也子欲磨其厚以等其薄厚者未動而薄者先穴矣此負薪能談王道者耶

巫蠱

漢武帝惡巫蠱如仇讎蓋夫婦君臣父子之間嗷嗷然不聊生矣然史記封禪書云丁夫人雒陽虞初等以方祠詛匈奴大宛已且為巫蠱何以責其下此最可笑

字謎

鮑明遠詩有字謎三首飛泉仰流者舊說是井字又
乾之一九隻立無偶坤之二六宛然雙宿云是小字
又頭如刀尾如鉤中間橫四角六右面負兩刃左邊
雙屬牛乃龜字也

論墨

近人論墨不取其光光而不黑是為棄墨黑而不光
索然無神氣亦復安用要使其光青而不浮湛湛如

小兒目睛乃佳

佛菩薩語

濟南監鎮宋保國出其所集王荊公華嚴余曰華嚴
有十八卷今獨解其一何也公謂我此佛語至深妙
他皆菩薩語耳曰余於藏經中佛語取雜菩薩語中
復取菩薩語雜佛中子能識其非是乎曰不能也非
獨子不能荊公亦不能也予昔在岐下聞河陽猪至
美使人往致之使者醉猪夜逸買他猪以償吾不知

也客皆大詫以為非他產所及已而事敗客皆大慚
今荆公之猪未敗耳屠者賣肉娼者歌唱或因以悟
子若一念清淨墻壁瓦礫皆說無法而云佛語深妙
菩薩不及豈非夢中語乎保國曰唯

李赤詩

姑孰堂十咏恠其語不類太白王平甫云此李赤詩
也赤自比李白故名赤後為廁鬼所惑死今觀其詩
止於此以太白自比其心疾已久矣豈廁鬼之罪耶

論茶

除煩去膩不可缺茶然暗中損人不少吾有一法每
食已以濃茶漱口煩膩皆出既令脾胃不知肉在齒
間消縮脫去不煩挑刺而齒性便若緣此堅密率皆
用中下茶在上者亦不常有數日一啜不為害也此
大有理

魯直詩文

黃魯直詩文如螭蟬江瑤柱格韻高絕盤食盡廢然

不可多食多食則發風動氣

論漆

漆畏蟹予嘗使工作漆器工以蒸餅潔手而食之宛轉如中毒狀急以蟹食之乃蘇墨入漆書善然以少蟹黃敗之乃可不爾即堅頑不可用也

二紅飯

今年東坡收大麥二十餘石賣之價甚賤而粳米適盡故夜課奴婢舂以為飯嚼之噴噴有聲小兒女相

調云是嚼虱子然日中腹饑用漿水調淘食之自然
甘酸浮滑有西北村落氣味今日復令庖人雜小豆
作飯尤有味老妻大笑曰此新樣二紅飯也

大禹周公

東坡將別乞一言於徐仲車曰自古皆有功獨稱大
禹之功自古皆有才獨稱周公之才以其有德以將
之故耳

欽定四庫全書

類
卷九

類說卷九

欽定四庫全書

類說目錄

卷十

仇池筆記下

論設醴

服松脂

孔北海

梁賈

雞唱

王晉卿墨

徐仲車二反

論漢武帝

硬黃臨二王書

魯直詩

寶應民

佛受戒平冤

君謨書

張子野詩

林檎詩

鳳咮研

李十八草書

楊凝式書

杜甫詩

與曇秀唱和

文與可詩

論董秦

樂天燒丹

盤游飯骨董羹

參寥詩

煮猪頭頌

菰草詩

端午日採艾

治內障眼疾

潘谷墨

雪堂義尊

顏魯公臨逸少字

歐公書

荆公書

真人之心

搬運法

勤修善果

衆狗不悅

三老人問年

夢韓魏公

真一酒

法報化三身

蒸豚詩

儋耳地獄

五穀耗地氣

梅詢非君子

吳育不相

時無英雄豎子成名

永洛之役

二李優劣

太尉足香

西征途中詩

招高麗

易書論語說

太極真人

論金鹽

放生池碑

三駿馬

誦金剛經

神清洞

論杜甫杜鵑詩

轅釜

論淳于髡

竹雄雌

禁不殺生

廣利王召

類說目錄

欽定四庫全書

類說卷十

宋 曾慥 編

仇池筆記下

論設醴

楚元王為穆生設醴王戊即位忘設穆生遂謝病去
申公白公留戊稍淫暴二人諫不聽赭衣雜舂於市
申公愧之歸魯而趙綰王威言於武帝以蒲輪召卒
坐綰賍事病免穆生遠引於未然之前申公眷戀於

既然之後謂禍福皆天不可避絕者未必然也

服松脂

松脂以真定者為良細布袋盛漬水中沸湯煮之浮水面者策簾掠取投新水久煮不出者棄不用入白茯苓末杵羅為末每日取三錢匕着口中用少熱水漱仍如常法揩齒更啜少許熱水熱之仍漱齒牢牙駐顏烏髭也

孔北海

王鞏云張安道說蘓子瞻比孔北海諸葛孔明曰孔
明吾豈敢望北海或似之然不至若是之蠢也夫孔
明以忠義氣節冠天下其勢足與曹操相輕重決非
兩立者北海以一死捍漢豈所謂輕於鴻毛者何名
為蠢哉

梁賈

梁民有賈於南者七年而返茹啖海藻呼吸山川之
秀飲泉之香食土之潔泠泠然風氣如在其左右倦

遊以歸且謂得道徜徉舊都莫已若也入其家登其堂視其妻返驚以走妻勞之則曰何關於汝唾而不顧曰若何足以當我竟逐其妻賈歸三年鄉人憎其行不與為婚及土地風氣烝變其毛髮啜菽飲水動搖其肌膚前日之醜稍稍復故於是還其室相待如初君子謂是行也賈薄於義多矣富易交不常其所守名教之罪人乃不知學術者蹈而不知恥也交戰利害之場相靡是非之境往往忠臣為敵國孝子為

降虜前後紛紛何獨梁賈也耶

雞唱

光黃人二三月羣聚謳歌不中音律宛轉如雞唱耳
與雞人唱漏微相似但極鄙野漢官儀宮中不畜雞
汝南出長鳴雞衛士俟於朱雀門外專傳雞唱又應
劭曰今雞鳴歌也晉大康地道記曰後漢衛士習此
曲於闕下歌之今雞唱是也顏師古不攷古本妄破
此說今予所聞豈雞唱之遺音乎土人謂之山歌云

王晉卿墨

王晉卿遺墨用黃金丹砂墨成價與金等三衢蔡瑋
自烟煤膠外一物不用特以和劑有法甚黑而光殆
不減晉卿胡人謂犀黑暗象白暗可以名墨亦可以
名茶

徐仲車二反

徐積字仲車古之獨行於陵仲子不能過然其詩文
則恠而放如玉川子此一反也耳曠甚畫地為字乃

始通終日面壁坐不與人接而四方事無不知此二反也

論漢武帝

治道無足觀者惟踞廁見衛青不冠不見汲黯為可佳耳若青奴才雅宜舐痔踞廁見之政其宜也

硬黃臨二王書

王會稽父子書存於世者蓋一二數唐人薛稷之流硬黃臨倣亦足為貴

魯直詩

讀黃魯直詩如見魯仲連李太白不敢復論鄙事雖
若不入用亦不無補於世也

寶應民

秦大虛言寶應民有以嫁娶會客者酒半客一人徑
起出門主人追之客將赴水主人急持之客曰有婦
人以詩召我其詞云長橋直下有蘭舟破月冲烟任
意遊金玉滿堂何所用爭如年少去來休倉惶就之不

知其為水也

佛受戒平寃

李如損之妹旣笄發病見前世寃對日日咎之遂歸誠佛法夢中見佛與受戒平寃者李因蔬食不嫁君謨書

僕嘗論蔡君謨書為本朝第一議者多以為不然或謂君謨書為弱殊非知書者若江南李主外勁險而中實無有此真可謂弱者以李主為勁則宜以君謨

為弱

張子野詩

筆老妙歌詞乃餘波爾華州西溪云浮萍破處見山
影野艇橫來聞草聲和我詩云愁似鰥魚知夜永懶
同蝴蝶為春忙若此之類皆可追配古人而世俗但
稱其歌詞昔周昉畫人物入神氣但知有周昉士女
可謂未見好德如好色者歟

林檎詩

子邁幼作林擒詩云熟顆無風時自落半腮迎日鬬鮮紅於等輩中號有思致者今已老無他技嘗作酸棗尉有詩云葉隨流水歸何處牛帶寒鴉過晚村此亦可人鳳唼研

僕好用鳳唼石研論者多異同蓋少得真者黯淡灘石亂之耳唐彦猷以青州紅絲石為佳或云惟堪作戩盆蓋未見佳者

李十八草書

劉十五論李十八草書謂之鸚哥嬌意謂鸚鵡能言
不過數句大率雜以鳥語十八後稍進以書問僕近
日比舊如何僕答曰可作秦吉了矣

楊凝式書

唐末五代文章卑泥字畫從之而楊凝式書筆跡雄
強往往與顏柳相上下今世多稱李建中宋宣獻此
二人書僕所不曉宋寒而李俗殆是浪得名惟蔡君
謨詩書姿格既高而學亦至當為本朝第一

杜甫詩

詩固無敵然自致遠以下句甚村陋也世人雷同不復譏評過矣然亦不能掩其美也

與曇秀唱和

余在廣陵送客山光寺曇秀作詩云扁舟乘興到山光古寺臨流勝氣藏慚愧南風知我意吹將草木作天香余和云關裏清遊借隙光醉時真境發天藏夢回拾得吹來句十里南風草木香

文與可詩

昔對歐公誦文與可詩云美人却扇坐羞落庭下花
公云世間元有此句與可拾得爾

論董秦

玉川子月蝕詩云歲星主福祿官爵奉董秦詳味此語
當是無功而享厚祿者董秦李忠臣也天寶末屢戰立
功亦頗知義代宗時吐蕃犯關徵兵秦即日赴難或
勸擇日答曰君父在難乃擇日耶後汚朱泚僞命誅

考其終始非無功而享祿者不知玉川子何以有此句

樂天燒丹

樂天作廬山草堂燒丹欲成而爐鼎敗明日忠州刺史除書至乃知世間出世間事不兩立也

盤遊飯骨董羹

江南人好作盤遊飯鮓脯膾炙無有不埋在飯中里諺曰掘得害子羅浮穎老取凡飲食雜煮之名骨董

羹詩人陸道士出一聯云投醪骨董羹鍋內掘窖盤
遊飯碗中

參寥詩

夜夢參寥携一軸詩見過覺而記其飲茶詩兩句云
寒食清明都過了石泉槐火一時新夢中問火固新
矣泉何故新答曰俗以清明日淘井

煮猪頭頌

淨洗鍋淺着水深壓柴頭莫放起黃州賤如土富者

不肯食貧者不解煮有時自家打一碗自飽自知君
莫管

菰草詩

杜子美有除菰草一篇蜀中謂之毛菰毛芒可畏觸
之如蜂螫治風疹以此草點之一身失去葉背紫者
入藥杜詩註云菰音潛山韭也

端午日採艾

端午日日未出時以意求艾似人者採之以灸殊效

一書中見之忘其為何書也又未有真似人者於明
暗間以意命之而已萬法皆妄無一真者此何疑也
治內障眼疾

本草云熟地黃麥門冬車前子相雜治內障服有效
屢試信然其法細搗羅蜜丸如桐子大三藥皆難搗
羅和合異常甘香真奇藥也露蜂房蛇蛻皮亂髮各
燒灰存性取錢七酒服治瘡久不合

潘谷墨

墨既精妙而價不二日忽取欠墨錢券焚之飲酒
三日發狂赴井死人下視之跌坐井中尚持數珠也
雪堂義尊

元祐中駙馬都尉王晉卿致墨十數品雜研之作數
十字以觀色之淺深若果佳當搗和為一品酒之和
者謂之雪堂義尊今又為雪堂義墨耶

顏魯公臨逸少字

顏真卿寫碑惟東方朔畫贊最為清雄後見逸少本

乃知魯公字字臨此雖大小相懸而意良是非自得於書未易為言之也

歐公書

歐公用尖筆作方濶字神采秀發膏潤無窮後人見之如見其清眸豐頰雅趣裕如也

荆公書

王荆公書得無法之法然不可學學之則無法僕書作意求之頗似蔡君謨稍得意則似楊風子更放則

似言法華

真人之心

道家云心不離田手不離宅又云真人之心若珠在淵衆人之心若瓢在水

搬運法

揚州有武官官二廣十餘年終不染瘡面紅膩腰足輕快初不服藥惟每日五更起坐兩足相向摩湧泉無數以汗出為度歐公平日不信仙佛笑人行氣晚

年云數年來足瘡一點痛不可忍近有一人傳一法
用之三日不覺失去其法垂足坐閉目握固縮穀道
搖颰兩足如蹴毬狀氣即伏氣平復為之日八九得
暇即為乃搬運捷法也文忠痛已即不廢當有益

勤修善果

佛言三千大千世界空華亂起亂滅而況我在此空
華起滅之中寄此須臾貴賤壽夭得失賢愚所計幾
何惟有勤修善果以升神明照遣虛妄以誠知本性

最為著身要事也

衆狗不悅

惠州市寥落然猶日殺一羊不敢與在官者爭買時
囑屠者買其脊骨間亦有微肉熟煮熱漉井水不熱
則泡不除隨意用酒薄鹽炙微焦食之終日摘剔得
微肉於牙齦間如食蟹螯三五日一食甚覺有補子
由三年堂庖所食芻豢滅齒而不得骨豈復知此味
乎此雖戲語乃可施用用此法則衆狗不悅矣

三老人問年

嘗有三老人相遇或問之年其一曰吾年不可計但憶少時與盤古有中外一曰海水變桑田吾輒下一籌已滿十屋矣一曰吾所食蟠桃棄其核崑崙之下今與崑崙齊以予觀之與蜉蝣朝菌何以異哉

夢韓魏公

夜夢登合江樓月色如水韓魏公跨鶴來曰被命同領劇曹故來相報他日北歸中原當不久也

真一酒

余在白鶴新居鄧道士忽叩門時已三鼓家人盡寢
月色如霜其後有偉人衣桃柳葉手携斗酒丰神英
發如呂洞賓曰子嘗真一酒乎就坐三人各飲數盃
擊節高歌合江樓下海風振水大魚皆出袖出一書
授予乃真一法及脩養九事其末云九霞仙人李靖
書既去恍然

法報化三身

近讀六祖壇經說法報化三身使人心開目明然尚
有一諭眼見是法身能見是報身所見是化身何謂
眼見是法身眼之見性非有非無無眼之人不免見
黑眼睛枯亡見性不滅則是見性不緣眼但無去無
來無起無滅故云眼見是法身何謂能見是報身見
性雖存眼根不具則不能見若安養其根不為物障
常使光明洞徹見性乃全故云能見是報身何謂所
見是化身性根既全一彈指頃千變萬化縱橫變滅

俱是妙用故云所見是化身

蒸豚詩

王中令既平蜀饑甚入一村寺僧醉甚箕踞公欲斬
之僧應對不懼公竒之公求蔬食云有肉無蔬餽蒸
猪頭甚美公喜問止能飲酒食肉耶為有他技也僧
言能詩公令賦蒸豚立成云嘴長毛短淺含臙久向
山中食藥苗蒸處已將蕉葉裹熟時魚用杏漿澆紅
鮮雅稱金盤飮熟軟真堪玉箸挑若把羶根來比並

羶根自合吃藤條公大喜與紫衣師號

儋耳地獄

儋耳城西民處子病死兩日復生云黃昏有人引至官府簾下言誤追庭下一吏云無罪可放還見獄在窖中繫者皆儋人僧尼十六七有一嫗身皆黃毛如驢馬械而坐處子識之儋僧之室也又一僧死二年其家方大祥有人持盤食及數千至付僧僧持數百饋門者及持飯入門繫者紛爭取其飯僧所食無幾

又一僧至見者皆擎跪作禮僧曰此人可差人送還處子驚悟是僧豈所謂地藏菩薩者耶

五穀耗地氣

吾昔有田在蘄水僅種一斗得稻十斛問其故云連山皆野草散水不生五穀地氣不耗故發如此以是知五穀耗地氣為最甚王莽末天下旱蝗黃金一斤易米一斗至建武二年野穀旅生野蠶成繭五年漸少而農事益脩益久不生穀地氣亡所耗蘊蓄日久發

而為野蠶旅穀地不生草木者多產金錫亦其理也
梅詢非君子

真宗時或薦梅詢者上曰李沆言其非君子時沆之
沒二十年矣歐公嘗問蘇子容宰相沒二十餘年能
使人主追信其言者以何道子容曰無心故耳

吳育不相

陳執中罷相仁宗問誰可代卿者執中舉吳育上即
召之會乾元節宴育偶醉坐睡忽驚顧撫床呼其從

者上愕然即除西京留臺執中雖俗吏亦可賢也育之不相命矣晚節有心疾亦難大用

時無英雄豎子成名

先友史經臣曰阮藉登廣武而嘆曰時無英雄豎子成名蓋謂沛公為豎子乎曰非也傷時無劉項豎子指晉魏間人耳李太白登廣武詩曰沈酒呼豎子狂言非至公乃知太白亦誤認嗣宗與先友無異嗣宗雖放蕩本有志於世者晉魏間多故一放於酒耳何

至以沛公為豎子乎

永樂之後

張舜民云永樂之後李舜舉徐禧李稷皆在虜中上以手詔賜西人云若能保全吏士當盡復侵地詔未至而舜舉等已死聖意可謂重一士而輕千里惜此等不被其賜也哀哉

二李優劣

中官李舜舉死於永樂將死以故紙半幅書曰臣舜

舉死無所恨但願陛下勿輕此賊使黠者間走以聞
時李稷亦將死書紙尾曰臣稷死上為一慟然二人
優劣賢不肖已可見矣

太尉足香

方李憲用事士大夫或奴事之穆衍孫路至為執袍
帶王中正盛時俞充令妻執板以侑酒彭孫本一劫
盜招出氣陵公卿韓持國至詣其第出妓飲酒酣慢
持國持國不敢對然嘗為李憲濯足曰太尉足何香

也憲以足踏其頭曰奴諂不太甚乎孫在許下私招
逃軍三百人役之予時將乞許覲至郡考實斬訖乃
奏會除潁而止

西征途中詩

張舜民通練西事稍能詩從高遵裕西征回途中作
詩曰靈州城下千株柳總被官軍砍作薪他日陽關
歸去後將何扳折贈行人青岡峽裏韋州路十去從
軍九不回白骨似山山似雪將軍莫上望鄉臺為李

察所奏貶郴州監稅舜民云官軍圍靈武不下糧盡而返西人城上問官軍漢人瓦擦否答曰瓦擦城上皆笑瓦擦者慚惶也

招高麗

王炳之言昔為密院檢詳見高麗公案始因張誠一使契丹於軍帳中見高麗人私語本國主向慕中國之意歸而奏之先帝始有招徠之意樞密使呂公弼迎合親書札子乞招迎遂命發運使羅極遣商人招

之天下知罪極而不知罪公弼如誠一蓋不足道也
矣

易書論語說

孔壁汲冢竹簡科斗皆漆書也終於蠹壞漢編鐘石
鼓益堅古人為不朽之計至矣然其妙意所以不墜
者特以人傳之耳易言神而明之存乎其人吾作易
書傳論語說亦粗備矣嗚呼又何以多為

太極真人

東海徐則隱居天台絕粒養性太極真人徐君降曰
汝年八十當為王者師然後得道晉王廣聞名召之
則曰吾今年八十三王來召我徐君之言驗矣遂詣
揚州王請授道辭以時日不利後數日死道路皆見
其徒步還山云得放還乃取經書分遺弟子而去既
而喪至衆以為高世之人義不為帝所污不肯傳道
而死徐君之言聊以避禍豈所謂危行言遜者耶不
然煬帝之行鬼所唾也而太極真人豈置之牙齒間

哉

論金鹽

王莽敗時省中黃金三十萬斤陳平用四萬斤間楚
董卓郿塢金亦多其餘賜三五十斤者不可勝數近
世金不以斤計雖人主未有以百金與人者何古多
而今少也鑿山披沙無虛日金為何往哉頗疑寶貨
神變胡可不知復歸山澤耶嘗聞鹽亦然峽中大寧
監煎鹽日有定數若大商覆舟則鹽數頓增乃知尋

常便液之出不拘遠近皆歸本源也

放生池碑

湖州有放生池碑載其所上肅宗表云一日三朝大明君子之孝問安視膳不改家人之禮魯公知肅宗有愧於此乎孰謂公區區於放生哉

三駿馬

唐李將軍司訓作明皇摘瓜圖嘉陵山水帝乘驃起三駿與諸王嬪御十數騎出飛仙嶺下初見平陸馬

皆若驚而帝馬見小橋不進止作此狀不知三駿為
何今乃見岑參詩有衛馬赤驃歌云赤驃胡騶金剪
刀平湖剪出三駿高乃知唐御馬多剪治而三駿其
飾也

誦金剛經

近歲有人取銀鑛至深處聞人誦經聲發之得一人
云吾亦取鑛者以山壞不得出居此不知幾年平生
誦金剛經嘗以經自隨每有饑渴之心則有人自臍

下以餅餌遺之殆此經變現也道家言守一若饑一與之糧若渴一與之漿此人豈得所謂一者乎

神清洞

曹渙遊嵩山中途道士坐於石上喚曰汝非蘇轍之壻曹渙乎顧其侶曰何人曰老劉道士寓此未嘗與人語道士曰蘇軾歐陽永叔門人汝以永叔為何等人渙曰文章忠義為天下第一道士曰世所知者如是而已我永叔同年也此袍得之永叔蓋嘗破而不補

未嘗垢而洗也近得書甚安汝豈不知神清洞乎汝與
我以某年某月某日同集某處我當年以某月日化
於石上復坐不復語渙亦行入山果如期化於石上
論杜甫杜鵑詩

南都王誼伯謂杜子美詩歷五季兵火多舛缺且如
西川有杜鵑東川無杜鵑涪萬無杜鵑雲安有杜鵑
蓋是題下註斷自我昔遊錦城為首句誼伯為誤矣
子美詩備諸體豈可以文害辭詞害意耶原其意類

皆有感亦詩之比興離騷之義歟按博物志杜鵑生子
寄之他巢百鳥為飼之江東所謂杜宇昔為蜀帝王化
禽飛去舊城荒也禽鳥至微知有尊故子美云重是古
帝魂又曰禮若奉至尊譏當時刺史有不禽鳥若也
明皇以後天步多棘刺史能造次不忘君者可數也
嚴武在蜀賦歛刻剝實資中原是西川有杜鵑耳其
廢王命擅軍旅絕貢賦如克遜在梓州為朝廷憂是
東川無杜鵑耳涪萬雲安刺史微不可考凡承君者

為有也懷二者為無也誼伯又云子美不應疊用韻
子美自我作古疊韻何害於詩

輶釜

高祖微時過其丘嫂食嫂厭叔與客陽為羹畫輶釜
由是絕嫂及立齊太子而伯子獨不得侯太上皇以
為言高祖曰非敢忘也為其母不長者封羹頡侯高
祖號大度不記人過然不置輶釜之怨獨不畏太上
皇記分盃之語乎

論淳于髡

淳于髡一斗亦醉一石亦醉於州閭之間男女雜坐
幾於亂矣何諷之有益有微意以多少知無常知飲
酒之非我觀變識妄平生之嗜亦少衰矣是以託於
放蕩之言而能規荒主長夜之飲世未有識其趣者
竹雄雌

竹有雄雌雌者多笋故種竹當種雌自根而上至梢
一節發者為雌物無逃於陰陽信哉

禁不殺生

予少不殺未能斷也近年始能不殺猪羊性嗜蟹每
見餉者皆放之江中雖知無活理庶幾求一活使不
活亦愈於烹煎也親遭患難不異鷄鴨之在庖厨不
忍以口腹之故使有生之類受無量怖苦爾猶恨未
能忘味食自死物也

廣利王召

予一日醉眠有魚頭鬼身者自海中來云廣利王請

端明予被褐履草黃冠而去亦不知身步入水中但聞風雷聲有頃豁然明白真所謂水晶宮殿也其下驪目夜光文犀尺璧南金火齊不可仰視珊瑚琥珀不知幾多也廣利佩劍冠服而出從二青衣予曰海上逐客重煩邀命有頃東蓬真人南溟夫人造焉出蛟綃丈餘命予題詩予賦曰天地雖虛廓惟海為最大聖王皆祀事位尊河伯拜祝融為異號恍惚聚百恠二氣變流光萬里風雲快靈旗搖虹蜺赤虬噴滂

泮家近玉皇樓彤光照無界若得月明珠可償逐客
債寓竟進之有鰲相公言蘇軾不避忌諱祝融字犯
王諱王大怒予退而嘆曰到處被鰲相公敗壞



類說卷十